



UNIVERSITÄTS-
BIBLIOTHEK
PADERBORN

Universitätsbibliothek Paderborn

Imago saeculi XVII. ad annum huius saeculi X. producta

Neuhusii Paderbornae, 1710

Annus 1638.

urn:nbn:de:hbz:466:1-29436

Nangasachi in Japoniâ die 17 Octobris illustri martyrio asseruit fidem Christianam P. Marcellus Mastrillus Soc. Jesu, qui ante annos tres Neapoli è morbo lethali, ingenti prodigio vitæ & sanitati integræ momento fuit restitutus ope D. Xaverii.

ANNUS 1638.

Cæsariani & Bavari sub Ducibus Savello & Werthio cogunt Weinmarium cum ingenti suorum & Gallorum auxiliariû clade solvere obsidionem Rheinfeldæ; sed dum agunt securiùs, ab eodem inopinatò obruti vel trucidantur, vel capiuntur. Werthius, qui omnium diutissimè restitit, cum Enckenfortio Speerreütero, Fürstenbergio, & aliis Præfectis, excepto Savellio, in Gallias missus fuit, grande donum Ludovico Regi. Victoriâ auxêre hosti Rheinfelda dedita cum castro Rötelenfi, tum Friburgum Brisgovix, & demum Brisacum non vi sed fame domitum.

Felicior fuit res Hatzfeldio supremo Cæsaris Tribuno in Saxoniâ inferiore contra binos Friderici Palatini filios Carolum Ludovicum & Rupertum, quos memorabili pugná ad Lemgoviam 11. Maji profligavit, capto ipso Ruperto, & Carolo vix agrè dilapso.

Amu-

Amurathes Turcarum Imperator hoc anno tandem Babylonem (aliis Bagdetum dictum) post quartum assultum totius exercitus 30000 armatorum expugnat. Desiderata ex Turcis 40000. plures ex Persis.

Galli cum magna ignominia & damno repelluntur ab obsidione Fontarabia & S. Audomari, cum majore coguntur Hispanis dedere Cremam in Italia post amissum Ducem Crequium; recuperant tamen per Ducem Longæ Villæ Lunæ Villam, aliasque nonnullas arces in Lotharingia, & in Burgundia.

Hollandi in Belgium exscendentes ab Hispanis profligantur, & ab obsidione Geldriae pro turbantur.

Casimirus Polonus Regis Uladislai frater designatus Pro-Rex Lusitaniae, dum per Franciam incognitus in Hispanias festinat, intercipitur, & Lutetiam captivus abducitur.

Mensis Septembris die 5. post annos 23. sterilis conjugii natus est Regi Galliaë Delphinus. Rex voti causa misit ad B. V. Laurentanam statuam Angeli ex argento solido sustentis suis ulnis infantem ex auro solido Delphini instar offerendum Deiparae.

Regina verò eòdem misit duas pretiosissimas coronas, unam pro infante Jesu, alteram pro Virgine Matre.

In Calabriâ exeunte Martio horribilis terræ motus urbes consentiam, Stilianum, Nicastrum, aliasque proximas cum omnib⁹ pagis concussit, & aliquot penitus obruit. Nicastrii solus Episcopus & Capucinerum Guardianus mortem evasere,

ANNUS 1639.

Dies 18 Julii sæviendi & vivendi finem fecit Bernardus Dux Weinmarius in floræ ætatis anno vitæ 35. extinctus peste Brisaci, vel ut alii, veneno, Miles & Dux bello clarus & felix. Moriens Guebriantio Armorico Gallo equum & arma, Comiti verò Nassovio, Erlachio Helveto, Ohemio, & Rosæ, primæ admissiois amicis, singulis decem imperialium millia ex testamento transcripsit, animam, cui servivit; eorundem curæ commendatus exercitus.

Vendito Gallis Brisaco Weinmarienses eo asse fiunt Francici, eorundemque stratego Generali Longævillæo, Coronæ Gallicæ Legato certâ tamen quorundam terminorum moderatione, Sacramentum dicunt.

In Saxonia iterum, ut anno priorè, res
Catho-